



КОНКУРС «Астана и Президент»

**Айтимова Гүлжанат,
Тасмола жалпы орта білім беретін мектептің 10 сынып
оқушысы**

Жүгі нарда, қазаны теңде болып, көшпелі ғұмыр кешкен қазақ халқы ертеден-ақ үш нәрсені бойтұмардай қасиет тұтып, қадірлеп өтіпті. Олар – туған ел, жер, ана тілі. Ел тағдыры, жер тағдыры, тіл тағдыры біз бүшін басты мәселе болмақ.

Еліміз озып, тіліміз өз мәртебесіне жетуі – еліміздің мәдениетті, өркениетті елдер қатарына қосылу үшін стратегиялық мәселе. Қазақ елінің бүгінгі таңда іргелі, мәдениетті елдер қатарына қосылып, ізгі ниетті адамдар назарына ілігуі оңайлықпен келген жоқ. Қазақстан әнұранында:

«Ежелден ер деген,

Даңқымыз шықты ғой.

Намысын бермеген

Қазағым мықты ғой!» –

деп қайсар қазақ халқының тағдыр тәлкегімен тіресіп қиын да қилы жылдарды басынан өткергендігі айшықты өрнектелген.

Елі үшін, жері үшін, туған халқы үшін атқа қонып, қолына найза ұстап өткен батыр бабалар алдында бүгінгі ұрпақ қарыздар. Олардың білектің күшімен, найзаның ұшымен қорғап қалған кең байтақ қазақ жері - өз ұрпақтарына қалдырған мұрасы, тапсырған аманаты.

Өткенімізді зерделесек, сіздер мен біздер – бүгінгі заманға «мың өліп, мың тіріліп» жеткен қазақ халқының ұрпақтарымыз. Осы уақытқа дейін еліміз небір қиын да ауыр кезеңдерді басынан кешірді. Әміршілдік-әкімшілдік жүйенің неше түрлі озбырлықтарын, тұтас халықты «ұлтшылдар» деп ар-намысы аяққа таптаған кездерді де көзімен көрді.

Өткен ғасырдың соңғы он жылдығы дүние жүзінде дәуірлік және заманауи ұлы оқиғалармен тарихта қалды. Мәңгілік жасайды деген

кеңес империясы құлады. Кешегі кеңестік республикалар үшін аса маңызды тарихи оқиғаларға толы жаңа заман туды.

Осы жаңа дәуірдің жарқын сәттерінің бірі – Қазақстан халқы сондай алмағайып, аласапыран заманда жоғары парасаттылық көрсетіп, береке-бірлікке, достық топтасқандығын көрсетіп, 1991 жылдың 1 желтоқсанында тұңғыш Президентін сайлады.

Президент туған халқының алдында: «Дана бабалар дәстүрімен осы салтанатты сәттегі сөзімді алдымен ата жұртыма, қасиетті халқыма арнаймын! Бүгінгі күн – Қазақ елінің шежіресіне мәңгі енетін күн. Тарихтың талай бұралаң белесінен өтіп, бұл күнге де жетіп отырмыз. Бәрін де көрген халықпыз, бәріне көнген халықпыз. Шүкір, кештеу де болса ес жиып, еңсе көтеріп, егеменді елдің туын тіге бастадық. ҚР-ның Президентін бүкіл халық сайлағаны – осы жолдағы ең биік белестің бірі. Елдің қамын ойлайды, намысын жібермейді деп бірауыздан сенім артқандарыңыз үшін шын жүректен алғысымды айтамын. Елім үшін, халқым үшін, Қазақстаным үшін тарихтың қай сынағына да тәуекел деп бас тігуге дайынмын. Бұл жолда ең алдымен дана халқыма, дархан еліме, ата-бабаның аруағына сүйенемін. Тарих көші ұзақ. Асықсақ та аптықпайық. Қазақстанның көп ұлтты халқының жұлдызы жоғары болатынына, туған елімізде дәулетті де сәулетті өмір орнайтынына кәміл сенемін. Сенімнен айырылмайық, бауырларым!» – деп ақтарыла сөйледі.

Бұл аса зор тарихи оқиға әрбір отандасымыздың санасында салтанатты күн болып қалады. Жақсы күн жарқын жалғасын тапты. Тарих үшін көзді ашып-жұмғандай ғана осы қысқа мерзімде он сегіз жылда мұндай дәрежеге жеткен қандай мемлекет бар? Тәубе дейік Тәуелсіздігімізге! Нұрсұлтан Әбішұлының сол кезеңнен бастап күні бүгінге дейін жасампаздықпен жүргізіп келе жатқан сындарлы саясаты – елге, ұлтқа, Отанға, адал қызмет етудің жарқын мысалы. Жанқиярлықтың үздік үлгісі.

Қазаққа, қазақстандықтарға келген азаттықты бастарына қайтсем бақ етіп қондырам, құт етіп дарытам деп алмағайып кезеңде ақыл-парасатқа жүгініп қимылдаған Президент Н.Назарбаев ұлттың ойдағысы орындалған ұлы күні – 1991 жылдың 16 желтоқсанында «ҚР-ның Мемлекеттік тәуелсіздігі туралы» Конституциялық Заңға қол қойды. Алладан бар тілегін ағынан сұрайтын қазақ топырағында тәуелсіз мемлекет ту көтерді! Ғарышқа қазақтың ұшуымен тұстас келіп, елдікке қол жеткізудің өзіндік бір жарасымдылығы сол тұста айқын аңғарылды. Таразы басында тартысқан, шарпысқан сан тарау пікір артта қалып, елдің ішкі бірлігі, сыртқы тұтастығы сынға түсетін сәт

туды. Енді ойлап қарасақ, Байқоңырдан Бәйтерекке дейінгі аралықта қаншама жетістіктер мен табыстар жатыр? «Білгенге маржан, білмеске арзан», – деген Абайдың данышпан сөзі осындайда айтылса керек.

Мемлекет басшысының әлемдік ауқымдағы қабілет-қарымына, саяси іс-қимылына, тиянақты шешіміне, тұралаған экономиканы ілгері бастыру жолындағы соны байламдарына, уақыт ағымына қарай ойластырған әдіс-тәсілдеріне қапысыз сенген халқымыз тұңғыш Президентіне әрқашан қолдау білдірумен келе жатыр. Соның арқасында ел жаңарды, жер жаңарды. Ел басшысы экономикалық тығырыққа тірелген, саяси дағдарысқа ұшырау алдындағы Қазақстанды жаңа дәуірлік жарқын күндерге жетелеп алып шықты. Азаттықтың ақ жолы Астанаға келіп, маңдай тіреді.

Елдің ішкі саясаты оның негізгі іргетасы екені белгілі. 2006 жылғы 11 қаңтардағы Президент инаугурациясы кезінде Нұрсұлтан Әбішұлы ең басты үш міндеттің ойдағыдай орындалғанын қанағаттанған сезіммен атап өтті. «Біз өте маңызды үш міндетті орындай алдық: өз мемлекеттігімізді құрдық, әлемдегі қарқынды дамып келе жатқан экономика жасақтадық, халықтың әл-ауқатын нақты түрде жоғары көтердік», – деді Елбасымыз.

Қазақ жері кең байтақ Өзінің көлемі жағынан дүние жүзінде 9-орын алатын, ақындық қуатпен айтқанда «бес Франция немесе тоқсан тоғыз Бельгия сыйып кететін» мұндай ұлан-байтақ жер – ата-бабаларымыздан мәңгілікке қалған асыл мұра. Тәуелсіздіктің туын көтерген кездегі ең басты міндет өз жеріміздің қасиетті әр пұшпағын өзгеге жем қылмау жағы болды. Мемлекет басшысының ерен еңбегі мен аса жоғары ұйымдастырушылық қасиеті арқасында Қазақстанның мемлекеттік шекарасы тарихта тұңғыш рет ресми түрде түпкілікті айқындалды.

Тәуелсіздікті тұғырлы да ғұмырлы ету тұрғысында атқарылған үлкен де іргелі жұмыс – өз әскерімізді жасақтау. Мемлекет басшысы, ең алдымен өз әскерімізді жасақтау, оның жауынгерлік – техникалық, тактикалық-стратегиялық қуаттарымен орнықтыру тұрғысында аса зор мәні бар бағдарламаны іске асырды. Соның нәтижесінде еліміздің әскери докторинасы дайындалып, тұжырымдалып, ол заман талабына сай сараптау мен бағалаудан өтіп, қабылданды. Жоғарғы Бас Қолбасшы Н.Назарбаев жасақтаған қуатты армия қазір Отан шебін, ел тыныштығын көздің қарашығындай қорғайтын дәрежеде.

Нұрсұлтан Әбішұлы азат күндердің алғашқы тынысынан бастап қазақ тілінің мәртебесі мен мерейін көтеру, оның пайдалану және қолдану аясын

кеңейту тұрғысында үнемі қамқорлық пен басшылық жасап келеді. Осы жылдарда мемлекеттік тілдің қолданылу аясының бұрынғымен салыстырғанда анағұрлым жаңа белеске шығуына Елбасының жетекшілік қызметі, адал ниеті көшбасшы болды. «Қазақ қазақпен қазақша сөйлессін», – деп бұл іске мән беріп, бастама көтерген Елбасының одан кейінгі жылдарда «Қазақстанның болашағы – қазақ тілінде», – деген ұстанымын ашып айтып, барша жұртымызды осыған ерекше мән беруге жұмылдырылды.

«Қасиетті қазақ жері – ата-бабаларымыздың даңқты тарихын аттың тұяғымен жазып кеткен жер» – деп Елбасы өзі айтқандай, сол тарихи жердің бірі Арқа төсіндегі Ақмола десек, осы жерге тәуелсіз елдің ғажайып астанасын салу тағы бір табысымыз еді. Қысқа мерзімде ерке Есілдің екі жағынан сән-салтанаты келіскен бүгінгі Елорданы тұрғызу басында қиялдай естілгені рас. Сенгеннен сенбегендер көп болғаны да шындық. Әлемде астана ауыстырудың 140-тан астам мысалы бар екен. Әрине, олардың бәрі бірдей сәтті бола бермеген. Ал Астана – Қазақстанның тұңғыш Президенті Н.Ә.Назарбаевтың ғасырлық қолтаңбасы, тәуелсіз еліміздің тарихи жеңісі.

Ерлікпен елдік мақсатына жеткен Елбасының бұл кемел жұмысы ерен іс демеске шараң жоқ. Тәуелсіз еліміз, тәуелсіз елдің өз астанасы болуы керек деген Президенттің озық ойы орындалды. Әлем жұрты дәл қазір Қазақстан десе – Астана, Астана десе – Назарбаев дейтін болды.

Астана – бүкіл Қазақстан халқының мерейі мен мәртебесі. Ғасырлар тербеген ұлы арманның орындалуы «Ескерткіш орнаттым мен қолдан келмес» деп ұлы ақын айтқандай, Арқа төсіндегі Астана – Қазақстан халқының жасампаздығына, тұңғыш Елбасымыз Нұрсұлтан Әбішұлы Назарбаевтың сол жасампаздыққа жеткізген жарқын жеңісіне орнатылған ең еңселі ескерткіш.

Алғашқы күннен мемлекеттік құрылымның керуен көшін түзу жолға салған Президенттің көрегендігі елдік тұғырымызды шайқамай, өркендеудің озық үлгісі негізінде бүгінгі күнге жеткізді. Дүние жүзі қазақты таныды. Қазақстанды білді.

Президентіміз еліміздің бүгінгісі мен келешегін ойлап, аянбай еңбек етіп, ғылым мен білімді дамыту арқылы елімізді өркениетті 50 елдің қатарына қосамын деп мақсатты түрде еңбек етіп жатыр. Намыс – жеңістің қолдаушысы деп білген халықпыз. Ұлттық намысы бар Қазақстанның кез келген азаматы егеменді еліміздің бірлігі мен тыныштығы үшін

[Введите текст]

экономикалық даму қуатына өз үлесін қосуы тиіс, мұны түсіне білсек, бұдан
асқан ерлік жоқ.